

Uunga siunnersuut: Peqqinnissaqarfiup sullissineri il.il. pillugit Inatsisartut peqqussutaata allanngortinnissaa pillugu Inatsisartut inatsisaat

(Akiliuteqartitsinerusalernissaq kiisalu taaguutinik atorneqartunik naleqqussaalluni nutarterinissaq pillugit malittarisassanik aalajangersaanissamut tunngavissaq)
(Peqqissutsimut Inunnullu Innarluutilinnut Naalakkersuisoq)

Saqqummiussissut

(Peqqissutsimut Inunnullu Innarluutilinnut Naalakkersuisoq)

Siullermeerneqarnera

Peqqinnissaqarfiup sullissineri il.il. pillugit Inatsisartut peqqussutaata allanngortinnissaa pillugu Inatsisartut inatsisaannut siunnersuut Naalakkersuisut sinnerlugit matumuuna saqqummiuppara.

Siunnersuut marlunnik pingaarnertut siunertaqarpoq.

Siullertut, nunatsinni peqqinnissakkut akeqanngitsumik sullinneqarnissamik pisinnaatitaaffeqanngitsunut akiliuteqartitsisalernissaq pillugu malittarisassanik aalajangersaanissamut maanna piginnaatitsissutaasup erseqqissarnissaa imartunerulernissaalu siunnersuutigineqarpoq. Taamaammat tassa akiliuteqartitsisalernissaq pillugu malittarisassatut atuutilersitat Peqqinnissaqarfiup sullissinermut ataatsimut toqqaannartumik aningaasartuutaaninngarnit amerlanerusunik akiliuteqartitsinermut akigititassanik aalajangersimasunik aalajangersaanissamut tunngavissinneqarnissaat siunnersuutigineqarpoq.

Akigititassanik naleqquttumik allaffissornermullu tunngasutigut pisariitsumik aaqquissuussinissamut inatsisitigut tunngavissamik erseqqissumik pisariaqartitsineq siunnersuuteqarnermut tunuliaqutaavoq. Tunngavissaq ilaatigut nunatsinni peqqinnissakkut akeqanngitsumik sullinneqarnissamik pisinnaatitaaffeqanngitsunik katsorsaanermut tunngasuni allaffissornermut aningaasartuutit aalajangersaanermi eqqarsaatiginissaannut atorneqarneqarsinnaassaaq, aammalu Naalakkersuisut akigititassanik aalajangersimasunik inatsimmi killigeqqusani tunngavissaaqqissut allat tunngavigalugit aalajangersaanissaannut periarfissiissalluni.

Siunnersuut kikkut nunatsinni peqqinnissakkut akeqanngitsumik sullinneqarnissamik pisinnaatitaaffeqartuunerannik allannguisuunngilaq. Innuttaasut malittarisassat naapertorlugit peqqinnissakkut akeqanngitsumik sullinneqarsinnaatitaanerit atuutiinnassaaq.

Aappaattut taaguutit atorneqartut ullutsinnut naleqqussarlugit nutarterneqarsinnaaqqullugit, inatsisissatut siunnersuut oqaatsitigut allaffissornikkullu pisariaqartutigut iluarsiinissamut aamma tunngasortaqarpoq.

Taamatut oqaaseqareerlunga siunnersuut Inatsisartunut matumuuna oqallisigisassanngorlugu
Naalakkersuisut sinnerlugit matumuuna saqqummiuppara.